

տրուած է Իտալիոյ Հիմա իր ապագայ ճակատագիրը խնդրոյ առարկայ է :

Յովհաննէս Թիւթիւնճի հոս ցամաք կ'ելլէ և ցամաքի ճամբով 12 օրուան մէջ կը հասնի բուն հապէշական երկիրին սահմանագլուխ Դիվարապաս, որուն արդի անունը և տեղը ճշգել չկրցայ դժբախտաբար : Սակայն որոշ է, որ անիկա կը գտնուէր Մասուռայէն Դուժպիա տանող ճամբուն վրայ և Դիկրէի կամ Տիգրէի նահանգին մէջ, հապէշ թագաւորութեան հիւսիսակողմը և սահմանակից Նուպիոյ :

Դիկրէ երբեմն եղած էր անկախ թագաւորութիւն. բայց յետոյ, այսինքն ԺԸ. դարուն վերջերը հպատակած է հապէշ կայսեր (տես Ագոնց. նոյն. էջ 554) :

Ագոնց (նոյն) նահանգին գլխաւոր քաղաքը ըոյց կու տայ Տոպարաւա կամ Տոպարովա և կամ Տուարանա, որ շատ հաւանօրէն պէտք է ըլլայ Յովհ. Թիւթիւնճիի Դիվարապասը : Ագոնց կ'ըսէ, թէ այս քաղաքը կոչուած է նաև Պարսա : Անիկա գլխաւոր քաղաքն էր այս նահանգին և թագաւորութեան, և մթերանոցը այն վաճառքներուն, որոնք կարմիր ծովուն ճամբով կը բերուէին արեւելեան Հնդկաստանէն : Հապէշիստան : Քաղաքը կը բաժնուէր երկու մասի, վերին և ստորին : Առաջինին մէջ քրիստոնեաները միայն կը բնակէին, իսկ երկրորդին մէջ՝ մահմետականները : Երկուքին շրջապատը միանգամայն՝ մօտաւորապէս 6 մղոն էր, և շէնքերը աղիւսակերտ (նոյն) :

Ըստ Ագոնցի տուած տեղեկութեանց (նոյն, էջ 554), Դիկրէ ունէր երկու փոխարքաներ կամ կուսակալներ, որոնք այս քաղաքը կը նստէին (էջ 555) և կը կոչուէին «նիկիւս պահար», այսինքն թագաւոր ծովու (էջ 554) :